

栗香五筆

粟香五筆卷六

臺灣十四則

宗觀察書

鷗堂遺文

廬橫詩

朱侍御輓聯

惜餘芳館詩詞

梁太史詩

遠暇室詩詞

方國簿詩

栖香詞二則

浣青集四則

冷吟仙館詩三則

粟香五筆卷六

江陰 金武祥 淮生

臺灣

辭嘉生孝廉紹元前客臺灣創纂省志未竣乙未季春澎湖告警遂內渡至粵出所撰雜事及辨誤數則見示曾參避寇蒙穀負書當滄海之橫流存赤嵌之記載摘錄於左略見梗概異日或闢虬髯之國或返龜陰之田皆足以資考證也

臺灣自康熙二十二年始入版圖時鄭氏割據已三世矣六月我提督靖海侯施琅克澎湖七月鄭克塽使來乞降其表文云論域中有常尊歷代紹百王而得統觀天意有攸屬興朝宅九土以受符誠五德之推移爲萬彙所瞻仰者也伏念先世自矢愚忠追懷前代之恩未沾新朝之澤穉子承祧惟思畏天之威莫求縮地之術茲蓋伏遇 皇帝陛下高覆厚載仁育義懷底定中邦如旭日昇而普照埽廓六宇雖浮

雲霧而復消苟脩文德以來遠人甯事勝心而焚海
內迺舳艦西下自揣履蹈之獲愆念此血氣無非霜
露之所墜顏行何敢再抗革心以表後誠昔也威未
見德無怪鳥駭於虞機今也悟已止迷敢後麟遊於
仁圃伏願視天地萬物爲一體合象胥寄棘於大同
云云表見閩海紀錄

康熙二十二年 賜靖海將軍侯施琅詩云島嶼全
軍入滄溟一戰收降帆來蜃市露布徹龍樓上將能

宣力奇功本伐謀伏波名其美南紀盡安流詩序云
海氛之不靖鯨鱉出沒波濤震驚濱海居民魚鹽蠶
織耕穫之利咸失其業朕心惻焉邇者滇黔隴蜀湖
湘百粵悉底救平蕞爾臺灣阻險負固爾施琅奉命
徂征決策進取樓船所指將士一心遂克島門逼其
營窟勇以奪其氣誠以致其歸捷音到闕時值中秋
對此佳辰欣聞凱奏瀛壖赤子獲登衽席用紓南顧
之憂惟爾丕績卽解是日所御之衣馳賜載褒以詩

讀之想見當日武功之盛

同治十三年十二月督辦船政大臣沈葆楨奏爲明
季遺臣臺陽初祖生而忠正歿而英靈懇 予賜諡
建祠以順輿情以明大義事本年十一月二十五日
據臺灣府進士楊士芳等稟稱竊維有功德於民則
祀能正直而一者神明末延平郡王賜姓鄭成功者
福建泉州府南安縣人少服儒冠長遭國恤感時仗
節移孝作忠願寰宇難容洛邑之頑民向滄溟獨闢

田橫之別島奉故主正朔墾荒裔山川傳之子孫納
土內屬惟我 國家宥過錄忠載在史宍厥後陰陽
水旱之沴時聞吁嗟祈禱之聲盼饗所通神應如答
而民間私祭僅附叢祠身後易名未邀 盛典望古
遙集眾心缺然可否據情奏請將明故藩鄭成功
准予追諡建祠列之祀典等因竝據臺灣道夏獻綸
臺灣府知府周懋琦等議詳前來臣等伏思鄭成功
丁無可如何之厄運抱得未曾有之孤忠雖煩 盛

世之斧斨足砥千秋之頑懦伏讀康熙三十九年

聖祖仁皇帝詔曰朱成功係明室遺臣非朕之亂臣賊子敕遣官護送成功及子經兩柩歸葬南安置守
塚建祠祀之 聖人之言久垂定論惟祠在南安而
臺郡未蒙 敕建遺靈莫妥民望徒殷至於 賜諡

褒忠我 朝恢廓之規遠軼隆古如瞿式耜張同儼
等俱以殉明捐軀諡之忠宣忠烈成功所處尤爲其
難較之瞿張奚啻伯仲合無仰懇 天恩准予追諡

竝於臺郡 敕建專祠俾臺民知忠義之大可爲雖
勝國亦華衮之所必及於勵風俗正人心之道或有
裨於萬一臣等愚昧之見是否有當理合奏乞 聖

鑒奉 旨賜諡忠節

臺灣布政使司光緒十三年置領府三曰臺北府曰
臺南府曰臺灣府直隸州一曰臺東州 臺北府爲

省會光緒三年置領縣三曰淡水新竹宜蘭 舊爲瑪
瑪蘭

廳一曰基隆 臺南府 舊爲臺灣府光
緒十三年改 領縣四曰安

平舊爲臺
灣縣

鳳山嘉義

舊爲諸
羅縣

恆春鳳一曰澎湖

臺

灣府光緒十三年移治領縣四曰臺灣彰化雲林苗栗廳一曰埔裏社

澎湖在宋屬流求至明始屬中國小琉球漫志云澎湖舊隸晉江縣臺灣紀略云屬同安縣攷泉州府志采陳懋仁南嶼雜誌以爲澎湖訟者取洩於晉江粵閩巡視紀略以爲閩書附晉江縣臺灣府志亦謂舊屬晉江康熙二十二年始撥隸臺灣

臺灣四面皆海中互大山其地域廣輪之數言人人殊惟海道圖說謂自北東北至南西南長二百十里中界最闊處六十里至七十里按圖所稱乃英國海里以三里當中國十里計南北長七百里東西最寬二百二十餘里爲最確光緒十三年籌議臺灣添改裁撤事宜疏則謂南北相距七百餘里東西近者二百餘里遠或三四百里

臺灣南北長而東西狹光緒十三年當事議脩鐵路

自基隆以達臺南會費絀且阻大甲溪不得過遂中止焉大甲溪者其源出臺灣縣之水底寮西行爲東勢角溪又西入苗栗縣界過大甲城南之彌頭山爲大甲溪西至腳踏港入海水激湍悍往來艱阻王文勤公凱泰嘗鑄鐵籠十二鎮中流施橋其上糜金錢數十餘萬春夏水發橋崩鐵籠九轉徙入海其三今尙存康熙間北路副將黃清泰有大甲溪詩云赴海水性急截流山勢橫忽然穿峽出終古作雷聲翻后

沙俱下危舩鬼欲爭誰能任巨濟用此愧平生

大甲吞霄後壠皆昔番社名今爲地名者也大甲番婦能織草爲席謂之番席績麻縷爲布謂之番布織績甚勤康熙朝北路副將阮蔡文詠之云大甲婦一何苦爲夫饑餉爲夫鋤爲夫日日績麻縷績縷須淨亦須長撚勻合線緊雙股斲木虛中三尺圍鑿開一道兩頭堵輕圓漫捲不支機一任元黃雜成組間采頗似虹霓生綻花疑落仙姬舞吾聞利用前民有聖

人一器一名皆上古況茲杼軸事機絲制度周詳供
黻黼土番蠢爾本無知制器伊誰遠近取日計苦無
多月計知何許但得稍間餘軋軋事偃僂番丁橫肩
勝綺羅番婦周身短布裋大甲婦一何苦

臺灣自林爽文之亂北路生番以鏢槍竹箭爲大軍
前驅大學士將軍福文襄倣四川屯練兵例創爲屯
番與之田而免其租乾隆五十五年總督伍拉納巡
撫徐嗣曾奏准設屯番十二所番千總二員把總四

員外委十二員是年爲 純皇帝八旬萬壽生番先
期入京七月十三日叩觀於 避暑山莊仍入京八
月十三日 純皇帝御太和殿生番恭進萬壽賀表
行慶賀禮先是 上諭生番人等到京照緬甸例交
內務府經理每十人日給羊一每人日給鹽一兩五
錢醃菜二兩對菜麥麵一兩六錢牛乳四兩每四人
茶葉一包燭四十二枝均給好米會典纂入事例蓋
一時盛事也番俗好飲酒婦人好歌舞諸羅知縣周

宗瑄詠番戲云蠻姬兩兩鬪新妝蹀躞花陰學舞娘
珍重一天明月夜春來底事爲人忙不掄檀板不吹
笙一點鈺聲一隊行氣味何如初中酒山花翠羽鬢
邊橫聯翩把袖自歌呼別樣風流絕世無番調可知
輸白雪也應不似潑寒胡野氣森森欲曙天維摩新
病未成眠空餘無限羅伽女亂把天花散舞筵一曲
蠻歌酒一卮使君那惜醉淋漓但令風物關王會我
欲從今學畫師

香祖筆記天啟改元有顏思齊者爲日本國甲螺引倭酋歸一王屯臺灣閩人鄭芝龍附之始建安平鎮城旣而荷蘭國人遭颶風至此愛其地借居之遂與倭約盡有臺灣之地而歲輸鹿皮三萬朱景英海東札記云舊志皆謂荷蘭借臺灣於倭不可則給之曰得一牛皮地足矣多金不惜及許荷蘭翦皮如縷周圍圈币至數十丈因築赤嵌城其說與明史所載佛郎機給呂宋相似夫呂宋王兄弟記稱其武而有信

當佛郎機奉黃金爲壽從乞地如牛皮許大姑笑許
之後以不欲失信故歸地焉若倭之狡黠狼貪恐難
以給而得也且地據一鯤身全島何用翦皮周布或
以所圍爲鎮北坊之赤嵌樓則一皮細縷何止四十
五丈三尺乎至謂荷蘭與倭約歲貢鹿皮三萬張倭
以全臺歸荷蘭乃傳聞之誤荷蘭已於萬歷年據臺
矣按雍正福建通志云天啟元年粵人顏思齊爲東
洋甲螺引倭屯於臺鄭芝龍附焉說同香祖筆記不

知思齊欲亂日本不成而奔尙何能引倭屯臺乎香
祖筆記誤以荷蘭歸一王爲倭酋因誤以荷蘭據臺
之年爲倭人入臺之年并以安平城爲倭築不知思
齊入臺在天啟四年安得曰元年乎思齊避禍入臺
不過借以托足並不與荷蘭爭地故得兼容思齊死
鄭芝龍繼之至芝龍降明而後去臺思齊本未得全
臺安得曰以臺與荷蘭乎倭之犯臺自在嘉靖年至
卽去之至萬歷年荷蘭始至倭與荷蘭先後不相接

安得曰荷蘭借居於倭歲輸鹿皮三萬乎

臺灣始末偶記云隆萬間華人劉香老林道乾賈其中尋踞之未幾爲顏思齊所奪思齊者亦華人習於倭而因以用之者也思齊死乃并入於紅毛鄭芝龍之投誠也子成功畱閩思得臺灣以苟存臺灣之門戶曰澎湖俗呼鐵門限以其有吸鐵石焉船至則膠前此之所以不通也至是洋人見王衣冠者乘巨鯤時時往來衝突其間踰月鐵石盡成功適載輜重至

停泊澎湖而使何斌誘諸番應於臺紅毛守者不能
拒成功遂僭王其中至康熙二十一年成功卒子克
塽來歸按臺灣始末魯之裕作其誤至以鄭成功爲
卒於康熙二十一年以克塽爲成功子其他可知矣
林道乾走呂宋在萬歷四年劉香老崇禎八年爲鄭
芝龍所殺二人先後不相及卽顏思齊之入臺灣在
天啟四年亦與道乾不相及而道乾之去臺灣豈得
曰思齊奪之思齊之據臺盜也紅毛之據臺商也各

不相涉思齊未至紅毛已在臺矣豈得曰思齊死而
紅毛并之澎湖有吸鐵石他書未聞然以爲前此因
而不通則自隋以來道澎湖者眾矣未嘗不通也衣
冠乘魚事亦見府志彼以爲夢也且在鹿耳門非澎
湖且入之而已非衝突吸鐵石也以文在 皇朝經

世文編

八十四卷

故特辨之

臺灣之名始見明史然列傳猶稱雞籠山不稱臺灣
澎湖之名則見宋史若福建海防攷謂隋開皇中遣

虎賁將陳稜略地至澎湖澎湖紀略謂由此澎湖之名見中國其說有二誤焉稜事數見隋書皆在大業朝上距開皇頗遠若開皇朝江左猶未平隋師何由遠略閩廣且至閩海外之流求澎湖乎其誤一也隋書大業六年帝遣武賁郎將陳稜朝請大夫張鎮州率兵自義安浮海擊流求至高華嶼又東行二日至龜鼈嶼不言至澎湖而云澎湖之名始見中國其誤二也龜鼈嶼者今澎湖之奎壁澳也蓋稜自義安至

流求過澎湖泊舟並非略地而曰略地澎湖其誤三也若海東札記竟疑當口陳稜不至澎湖則又不然澎湖廳志云奎璧澳距治二十三里原名龜鼈以形似得名邊方之人何知數典且已改名其非附會稜傳可知也府志物產龜鼈甲可亂瑇瑁澎湖紀略有瑇瑁無龜鼈是二是一未詳

臺北府淡水縣有市集曰艋舺艋舺船名也剗獨木爲之旁翼以板水易入而無沈沒之患土番用之淡

水廳志地名作猛舡噶瑪蘭廳志船名作莽甲仁和
郁永河采硫日記莽葛元來是小舡字又作葛閩音
不正故多歧異

宗觀察書

甲午季夏宗湘文觀察來書有云辱詢拙編碑傳述
諸家之紀載揚一代之盛美茲事體大誠未易爲作
者數人可得而論先正事略以傳舊而不著所出有
類於法盛之晉書者獻類徵以一人而兼錄數文或

譏爲桓譚之無要近刊錢氏碑傳大旨略同類徵況
錢書斷自嘉慶李書斷自道光咸同以來中興文武
勩業爛然欲補前哲之遺要亦後來者責弟竊不自
揆勤思蒐討上溯天命下迄於今積成巨編物具義
例大抵一人始末先擇一文爲主文所漏略乃更旁
搜薈萃節鈔是爲附見條舉事繫差免冗複凡所甄
錄悉著其名油素殫精汗青未易比來吳下方集友
朋攷獻徵文寫緜給札私冀於三書之外自成一家

之言此固不佞之侈心或亦執事所樂許也余覆書
云承示大著欲合先正事略耆獻類徵錢氏碑傳三
書棄短取長訂譌補闕誠不朽之盛業掌故之鉅觀
傳先哲之遺徽卽我朝之史藁嘗謂近日王氏東
華續錄是編年之體尊著是紀傳之體合之會典事
例及聖朝三通諸書是史志體一代鴻文於焉大
備云云宗旋分巡溫處海防倥傯前書恐未易卒業
竊謂既定體例宜輯咸同以來中興文武碑傳並補

嘉道以前三書所漏略者先彙梓以爲嚆矢其數已
近百卷再次第董理三書以集大成較易歲事當郵
質以促之

謹按我朝史事二百數十年如歷朝聖訓代奉
頒行滿漢諸臣列傳世多寫本更有敕撰一統

志八旗及各直省通志諸傳足備采錄其平壤內外
則有方略禮樂則有祭天祭神典禮器圖說通禮
官聯則有職官表刑法則有律例其信宮史三通

會典諸書外各部院衙門並有則例歷律輿地河渠
洎滿洲氏族 國書 國語咸考著成書足供史志
他日綜錄諸典以成一書取料可謂富備矣

鷗堂遺文

余既搜輯祥符周昉叔都轉詩詞日記彙以行世今
年介弟季貺太守復以遺文三篇交其外孫冒鶴亭
孝廉攜粵見示李蕤客評以爲字字矜鍊爰刻於此
以俟有錄 國朝文總集者俾入之以見一斑焉

重濬齋前小石池銘云池於齋之庭廣六尺徑半之
后其底以瀦水歲久失濬糞不可魚鹵不可藻虵鼃
窟之洩詠而泥游素老既卜居之明日顧而慨焉於
是汙者畚淤者鑿三日而水性以復工既與客臨觀
之洄雲激星滢滢然碧其聽一若與濬之人相媚相
勞苦也者銘之曰人心如水珠朗鏡澈一私滓之羣
穢是國昏德既滌靈源聿通動規地脉靜繪天容
小石池畜魚賦云既濬池之明日釣於芝溪獲魚凡

百鑿首莘尾漵漵策策媵以蒲藻池兮是適主人於是與客憩盤石據槁梧凝焉而游闖焉而逋哇丹躍碧羣媚其徒蓋勺水拳石之間而渺然如遇之江湖顧客而言樂哉魚乎客曰是池也廣不足浴牛深不足飲犬三日不雨暘及蛤蜊宅魚於斯猶鳥之筮而獸之檻也以此言樂樂於何選主人曰客不見夫魚之浩然而放乎滄溟也翔雲乘霧萬色千形朝嬉鯉壑暮秣龍津以游以食以娛其生以長其子孫信樂

矣而不知恩者畢者餌以藥者之日抱其器而相望
於水濱其或離人而居擇地而伏身不罹網罟饑不
膏鼎鑊潛鱗戢尾可謂至樂然而窮川巨浸百怪所
家鯨鯢蛟鱷之屬行且鼓其腹而糜其牙以此言樂
樂耶否耶今夫天下所甚樂之地必有所甚不樂者
存不樂而樂至樂之門

江上愁心賦并序云辛亥春杪爲膠城滬濱之游者
半月皆往來吳淞間旅枕迴潮懷人江上因擬唐賢

斯賦黃歇浦前鵝鳩啼龍華鎮上柳依依吳娘曲子
唱清夜前船後船腸斷時柔腸兮易斷恨牽人兮錦
纜羌愁心之紛紛雜江花而撩亂若乃春水方生夫
君遠行一碧千里對此傷情飾蘭舟與桂舫載離愁
其易盈夢復夢兮楚天遠怨復怨兮吳波平攀蘋花
於芳澤念欲寄而無人則有思婦高樓含情抱警怨
翠傳奩啼紅霰錦目斷柳色心隨帆影悵狂夫之歸
期乃不如乎潮準早潮生兮暮潮盼文鱗兮轉遙採

芙蓉兮泛蘭若思美人兮江之臯覆翠被兮秋冷絨
錦字兮春凋莫不相思相望黯然魂銷於是浦雨凝
愁汀雲鬢夢去槩鷗迎來舫燕送金爐夕張玉簫晨
弄拾翠江干懷人誰共愁矣哉江草萋萋江月斜江
洲杜若幾番花江流有時東到海客子行行應到家
聞昀老庚戌 朝考試律題爲山虛水深得蕭字有
鶴語空巖月龍吟大海潮句爲曾文正公激賞丙辰
散館試題擬唐崔護屈刀爲鏡賦以題爲韻押唐字

韻云聊同磨鏡人間小作神仙遊戲豈是吞刀市上
傳來術士荒唐爲時傳誦附錄於此云

廬擴詩錄

余與周涑人直刺昉叔都轉昆仲論文極沆瀣因輯
刻其所遺詩文介弟季貺太守星詒兩兄嘗亟稱之
無由台并今年其外孫冒鶴亭孝廉來粵囑攜示其
廬擴詩質自序近年作五律二百餘首錄七十餘首
爲仲脩審定四十七首并附題識謂樸屬微至於古

人似元次山今人似莫子德云余按其詩洗華落實
選擇極精錄其贈答諸友與余亦文字往還者題近
詩後寄譚仲脩杭州云詠歌從我癖譽詆任悠悠呻
獨瓜廬語吟悲漆女憂棄猶雞肋惜死覬豹皮畱望
望佳人遠烟波託蹇脩贈桐城蕭敬孚云性情膠漆
台賞解過從頻嗜學如甘肉醉心猶飲醕見聞徵野
錄言動一天真確爾安儒素東南祇數人題趙樾村
向湖詩集云當代論才子惟君集眾長氣鍾洱海秀

色醞點山蒼碧漢星芒角黃河日混茫東南誰勅敵
蛇鳥陣堂堂錄此益增天末涼風之感

季貺舊有露筋祠懷五兄素人云孤舟對酒不成歡

衰柳荒祠畫雨寒七字沈吟見高格

兄題壁詩云千古死應無此法

斯人奇在不知名頗愛其半生憔悴事微官音書雁
奇警今過祠下偶憶及之

路三年隔風雨雞聲一夢難今日懷君腸斷路東風
吹淚過淮安涑人舊字素人露筋祠詩惜不得其全

首

朱侍御輓聯

義烏朱蓉生侍御一新於丙戌年上遇災脩省疏劾
及內侍以主事降補遂遊粵主講廣雅書院時與爲
文酒之會頗相投分及余甲午來粵猶數數過從乃
七月間遽以微疾卒年甫四十九也輓聯甚多錄尤
佳者梁鼎芬星海云斯人甚賢未報君父恩如何瞑
目視吾猶弟便傾江海淚未抵傷心陳三立伯嚴云
哀窮窳思賢才放逐餘生成負國息邪說拒諛行低

徊薄海更何人汪兆銓莘伯云風采振朝端言人所不敢言與郭華野曹容圃接武師承畱嶺表學者各傳其學是杭大宗全謝山一流尹恭保仰衡云海內聞風欽直節嶺南今日慟人師東省門人云燭瀛海先幾諫草具存東顧時艱歿猶視紹紫陽絕業遺書宛在南來薪盡火斯傳陳慶脩念孫云慨昔賢門戶之分折衷一是矯近世厓岸之習律已恆謙極中正極和平才士通儒齊俯首封事皆遠大之務諫草猶

存質疑成答問之編遺書可寶真經綸真學養文章
道德竝傳人徐紹楨固卿云負一時直臣名非徒文
苑儒林增光國史爲兩粵諸子慟豈第感恩知己獨
戀師門余亦輓以聯云觸邪一疏偃蹇江湖平生忠
愛難忘訝玉宇瓊樓長懷坡老話別三年重陪文酒
此日典型遽杳憶光風霽月誰嗣濂溪後又輓絕句
四首其三四云林巒如畫講堂開朋酒招邀憶幾回
此後城西好風景可堪重過彩虹來

出城至院必
經彩虹橋大

雅云亾久不羣重來嶺海孰論文鍾山別業

陳東塾齋額

隨山館

汪穀庵齋額

慟甚黃鑪又哭君

惜餘芳館詩詞

蓉生侍御前示詩稿余既錄四筆卷七矣其弟苗生
大令懷新同登庚午鄉榜後成進士以知縣歸廣東
卽用亦出示所著惜餘芳館詩詞于禺相屬殆不啻
何家大小山也題余子駿是我圖云瀉酒置兩器飲
吸相後先富貴亦不惡劍首一吷何茫然人生倏忽

少壯老誰能學幻窮真詮金華先生靜居者水宴林
嬉足風雅四十奮翊騫遠鴻五十低頭作仗馬大秦
幻術能寫真貌此不合時宜人滿胸壘塊澆不盡潑
眼精采還生新童時遊釣邈難得壯歲娛嬉亦陳迹
只今大隱在金門頗學楊雄老執戟車前寂寞無人
騶紙上閑默生千愁紛紛雞鷺自爭食鬱鬱鷹隼仍
棲鞫浮沈郎署已廿載與我周旋我猶在白眼何知
世路難朱顏莫任年時改金華洞天仙子家駐顏仙

草多於麻何當攜手入烟霧醉逐飛瓊萼綠華祭幽
曲云老巫琅琅手鈴語故鬼睚眦新鬼舞紙錢灰捲
陰燐飛風旋黃沙落如雨山邱零落悲華屋杜鵑夜
傷冬青哭其二云墓門翁仲飢欲死野棠撲簌風前
紫千歲觸體生齒牙半盂麥飯知誰家鬼車啾啾月
初黑共喜前村作寒食他如感賦云人生得意且行
樂白日一過飛黃埃甲戌仲春北上題壁云斷腸春
色遍離亭悔煞天涯作游子寄樓芸臯云饑腸欲枯

羨糠粃垂死得活翻號咷七古皆有豪逸俊邁之氣
惜餘芳館詞多於詩雄快處源出蘇辛金縷曲六撲
面塵如霧又今番馬蹄得得忍寒北去一抹荒烟斜
照外彷彿離魂無數更送到雁聲淒楚如許閒愁嘗
未慣甚愁人偏與愁相遇酒醒也在何處夜深鎮
向孤燈絮記年時有人相對綠窗眉嫵愧我近來增
落拓贏得青衫塵污但提起便傷遲暮望斷雲山千
萬疊莽天涯何處尋歸路今夜夢恐無據又下第後

由海道南旋云海氣連雲白甚青衫軟塵浣透又成
歸客掣電轟雷帆力健闖過水晶宮闕準擬倩玉妃
喚月伴我淋漓三百蓋更老龍捉板蛟吹笛淪落感
對伊說 休休漫學窮途泣算人生緣么紅袖足償
此失鶯燕聲聲催客夢尋遍玉人蹤跡歎回首都教
輕別臥看諸公誇得意但狂生笑等秋蟬翼長嘯起
暮潮急念奴嬌題樓芸皋丈戀花集云一生花底歎
萍飄梗泛又成羈客燕玉如花消旅況擬作長圓明

月鴛徑棲香蝶魂鎖夢綰就同心結杜鵑無賴酒邊
人又催別恨煞滾滾長江茫茫碧海故把離人隔
織女黃姑相望苦況比天河更闊哀樂中年憑他陶
寫賸有生花筆舊歡新恨箇中酸楚誰識

梁太史詩

余已卯入都晤番禺孝廉梁星海鼎芬少年文譽籍
甚春明庚辰入翰林以建言落職歸主廣雅書院己
丑重晤於學海堂年三十餘已虬髯繞頰壬辰復訪

之武昌朋簪話舊豪宕猶昔是冬又遇於吳門拉登
酒樓一醉而別錄示近作多奇崛之氣偶書云范璫
代胡銓邱濬洩王恕咄咄許怪事所言有根據澹庵
古遺直愛友心不污就令短書礪肝腸敵刀鋸瓊山
中自燒結宦已成痼挫哉三原友疏憤可以妒奚怪
阿鳳永揚鞭奪先路毋徒詡文章剛腸一回顧書憤
云犬夷有意敢侵陵欲往縛蛟無此醫百口不諧非
所患四肢將放竟安懲 至尊憂憤收和議使相從

容許歲繒一表草廬長未達本來淡靜卧龍能簡沈
寶樞云吾生有微尙爲子寫幽悃休惜露電影誰知
龜鶴年看雲常作絮吹雨不成烟欲待山中客樵期
訪偃佺別楊鼎勳云春花零亂滿湖湄沈醉東皇尙
未知百戰偶然猶在世再逢老矣竟何時託心有處
從人笑命意無端寫我悲濁酒一杯琴一曲浮生難
遣是臨歧沈二來訪山居因送之揚州云虞翻祠下
惜分襟花放春山獨遠尋一第艱難親不待廿年啼

笑我先瘖荒厓訪古亾碑字

山志有張公世傑題名訪之不見

野寺

論兵感劍鐔明日鞭絲歌吹路蕭條寒水莫驚心湖
樓坐雨同香驄伯嚴叔喬君立孝通作云咫尺湖陰
盡渺暝高樓不見遠山青一聲白鳥明烟樹半角紅
牆出畫屏眼底故人相爾汝尊前斷葉幾伶俜十年
磨劍悲秋慣風雨淒淒帶酒聽左文襄公祠下作云
嫋嫋清涼山下有故侯祠入門先哽咽升堂想威儀
昔來披襟言今來灑涕悲何止禮數異所貴心相知

漂搖十二載書生無一奇豈有天下才乃其癯僧饑
山林鼓角響如見雲中旗蒼茫不忍去礮落以陳詞

遠暇室詩詞

汪莘伯孝廉出示遠暇室詩稿秋懷云三日積雨歇
一夜西風生空庭走黃葉滿地皆秋聲秋聲入耳不
可聽直入愁腸與愁併千迴百結不自知白髮明朝
上明鏡白髮不可染明鏡不可磨我非謝東山中年
哀樂何其多其二云羣山蒼蒼東入海海上飈輪高

蟲鬼九州之外今已窮安期仙人竟何在不應蓬萊
山亦學桑田改百年難保望千載烏飛兔馳不相待
不如歸把窗前杯籬邊菊花已堪采其五云明燈一
點啼促織小兒挾書坐燈側琅琅頌聲差可聽老親
聞顏覓梨栗我時相對亦欣欣人生此景不易得衡
門棲遲且家食慎勿苦羨高官職頗有隨山館家法
尤工詞沁園春小除夕祀竈時有倭警云夕屆小除
祭設陘前聽吾祝詞愧黃羊未宰肉才掩豆薄醴難

醉酒但浮卮命果能司嬾甯可獻休咎從來定不移
觚邊踞願如聞警欬不薦膠飴 天門跌宕開時更
奏取通明殿上知說徒薪曲突更無上客蹈湯赴火
誰奮前麾煬蔽偏工趨炎成俗如沸如羹事可危枯
桐在但焦來爨下判絕金徽

方國簿詩

方子可國簿楷爲彥聞先生之孫元徵徵君之子幼
時乳媪不謹下階傷脊遂有僂疾旣長沈潛好學尤

究心疇人家言嘗手製地球曾文正公極賞之晚年
遊粵贈余所繪山水竝題冰泉詞後其子燮尹明經
出示遺稿題山居圖云涼風啟軒宇蕉露浥晨爽蕭
然高士居庭空絕繁響生涯托豪素聊用贍清賞君
子貴適性胡爲事鞅掌悠悠忘華簪羨子脫塵袂哭
湯詩林云良友聯嘉會斯人獨向隅倦遊生趣少早
逝旅魂孤客舍奠清酒悲吟當束芻詩成風雪夜燈
影黯流蘇送左孟辛歸楚南云離家張翰憶蓴鱸帆

趁長風過小孤鸚鵡才高曾滅刺驪龍夢穩自含珠
壯游添輯新詩本後會空忘舊酒釀此去重逢應不
遠好披雲霧揖天衢無題云千里蓬山簇黛螺細車
猶悵滯銀河娟娟皓魄圓時少黯黯芳心別恨多荃
佩恍疑聯夢影柳堤莫謾駐秋波閒庭飛絮渾無事
愁憑闌干鎖翠娥

栖霞詞

無錫顧梁汾典籍彈指詞三卷近其族孫又山爲之

重梓余在粵得補遺一卷寄與續刻之又山竝以典籍之兄景行明經匏園詞一首弟倚平茂才清琴詞二首及公姊碧汾女史栖霞詞一首附於後謂全稿均燬失無獲余甲午再次羊城在越華院長葉蘭臺部郎許得栖霞詞二卷爲山陽李芝齡侍郎於道光六年督學江右時刊本侍郎女弟文媛序云滿紙淒涼頗問梅花之影一庭沈寂如參簷蔔之禪憂非萱草可忘志豈幽蘭能托云云可以想其詞境碧汾女

史名文婉適侯氏詩刻梁溪詩鈔中詞則歷百數十
年始獲刊行庚申亂後絕無僅有當仍郵致又山重
鐫彈指詞後也

栖霞詞浣溪紗和王夫人仲英韻云百轉嬌鶯喚獨
暝起來慵自整花鈿浣衣風日試衣天 幾日不曾
樓上望粉紅香白已爭妍柳條金嫩滯春烟卜算子
憶嫫氏云木葉下庭皋鍼線無心理閒向黃花說可
憐依約織腰細 孤雁泣樓頭明月人千里十二闌

東坡志林卷之六

干獨自憑管遍愁滋味一翦梅云九十春光半已殘
詩興闌珊酒興闌珊鏡中憔悴不堪看羞畫眉彎嬾
畫眉彎 澁雨慳風特地酸不許春間不許人間年
年愁病苦相關花也長歎人也長歎如夢令梁汾弟
說歸不果云說道殘冬歸矣何事今春還未鉛粉褪
梅妝又報杏花微雨畱住畱住幾疊遙山烟樹南鄉
子云疏雨滴重檐鏡裏霜花昨夜添一片冷雲扶不
起慊慊畱住濃香莫捲簾 半晌嫩寒嚴帶減茱萸

一束織刀尺催人雙腕弱
摻摻愁緒如絲嬾去拈又
有天仙子十影三首余愛其自掬清流憐瘦影梅花
界斷闌干影繁華夢去難畱影三影已足不必以多
爲貴也

浣青集

錢孟鈿夫人刊有浣青詩鈔八卷續一卷傳本已少
亦於蘭臺院長許借錄之離愁曲云切切復切切春
愁亂難織藕斷見絲連燭殘餘淚滴擬古云平原有

甘井其下通流泉百夫日挽汲灌溉東西阡轆轤聲
不徹但聞水汨汨一汲井水渾再汲井水竭所以漢
陰叟抱甕不爲拙五丁關云侵曉渡寬川晨光散林
麓野竹媚幽姿山花麗空谷崎嶇上急坂曲徑馬蹄
踟百盤歷巔頂十步九旋縮怪石蹲類虎紛拏勢相
撲長松裂雲根羣峰抱日足浮烟淨列岫亂雪噴飛
瀑頓忘塵世情但覺天一握偉哉五丁力關此西南
軸恃險徒爾爲躍馬壯巴蜀放歌行云黃河西來入

渭濱一洗明月無纖塵
天空遠籟落清影
眾星歷歷羅秋夏
荆山良玉不得售
淡然去之若浮雲
黃鶴一舉可萬里
芙蓉不羨桃李春
豐城劍氣颯秋雨
魚目混珠徒爾許
丈夫磊落凌風霜
富貴於我亦泥土
滄浪之水清且漣
乘舟直向天邊去
通天臺銅人歌云
武皇歲起雲陽宮
高臺屹與銀漢通
欲求真訣鍊顏
色紫瓊之露飛濛濛
青霄不下兩皇子
十二仙人一夜死
文成五利不及一
少翁能使香魂望
如水淒淒

茂陵月玉筵埋苔碧難問舍人壺空羨方朔戟當途
代漢逾百年銅人之淚流作鉛移經灞水亦傷別迴
頭立盡東關烟君不見古今興廢皆陳迹金石有情
悲過客化爲銅駝卧荆棘寄弟婦云七載與君別相
思春水深近知還故國想已渡江潯歷亂桃花雨嬋
娟楊柳陰片帆明月夜淒斷故人心舟行寄曼亭云
且自加餐飯無勞憶遠人兒曹能接武宦況等浮塵
稱意歸林鳥忘憂脫網鱗何須問三徑風月卽嘉賓

潼關云潼關天險鬱嵯峨天外三峰俯大河六國笙
歌明月在五陵冠劍夕陽多時來傑士能捫蝨事去
將軍竟倒戈終古丸泥憑善守英雄成敗感如何張
子房祠在雷灊
紫柏山云狙擊早消秦帝膽借籌竟創漢家
基空疑狀貌同雌伏始信功名見獵遲帷幄總分黃
石略雲山不負赤松期高蹤迴出韓彭外紫柏千秋
護舊祠柳枝詞云渭城風物又經春嫩綠初齊客思
新記向大堤和雨折泥他青眼盼行人花未飛綿葉

翦藍風吹無力起眠三舊遊最有難忘處一路依依
近漢南贈王三姑青翰云楊柳歌殘又竹枝霜風吹
上髻邊絲人間多少繁華夢總在秋娘未老時寄曼
亭云以爾舟來道路賒好風遲我酌流霞君行若聽
來何暮應念吾家陌上花摘句如秋意云商飈爾何
來離緒生百端聽琴云空庭泛古音遠籟一時寂對
月云幽意不知暑茫茫海月生秋望云一片歸雲影
長空去復還寄弟云一夜西風急天邊雁影寒雪夜

不寐云窗色亂昏曉蒼茫起遠思春暮云老嫌骨肉
遠貧覺子孫多秋興云豈有魚龍悲晚歲漫勞鷹隼
擊高秋蓬山云花落只餘春寂寞燕歸何事意沈吟
臘盡云衣上風塵游子淚夢中燈火故人情新霽云
世外烟霞間處好人間風月靜中多皆有名大家氣
息

國風云女子有行遠父母兄弟此閨中所黯然銷魂
也浣青寄弟擬古云飛花一作絮飄落天之涯不敢

怨東風所悲離故枝
莊盤珠詠楊花詞云野棠村芳
草渡離卻枝頭總是傷心路同一用意

浣青詞三十二首亦有長亭慢詠楊花云似花似雪
渾無緒過眼韶光者般滋味數點霏微畫檐飄盡向
何許斷腸堪寄更莫問章臺路便折得長條已不是
舊時眉嫵 遲暮望天涯漠漠忍見亂紅無數池塘
夢醒倩鶯兒喚他重訴卻又被曉風吹去更淒冷一
天烟雨算只有灞橋幾曲綰愁千縷

吾常名家集後多附刻其室人詩詞如孫淵如觀察
芳茂山人集後附王采薇長離閣集陸祁生大令崇
百藥齋集後附錢詵宜五真閣吟稿是也惟崔曼亭
觀察著述無存僅有題辭五古及百字令咏牡丹詞
一首附錢浣青集則又夫以婦傳題辭有云媿無秦
嘉篇報瑀頻往復隨園題浣青集有嫁得才人蘇伯
玉之句蓋曼亭弱冠登進士亦負才名惜其所傳不
多耳

冷吟仙館詩

隨筆卷一錄左韻卿夫人詩係癸亥在贛州時叢瀛石太守見示之本舊題吟雲詩鈔者也夫人名錫嘉字浣芬夫歿改號冰如爲吾常左巢生司馬季女歸華陽曾吟村太僕曾卒夫人扶柩回蜀今閱三十餘年獲所刻冷吟仙館詩稿八卷詩餘文存一卷而吟雲爲集中第二卷與第一卷浣香小草皆閨中唱和旖旎風流至卷施吟冷吟集則柏舟以後事舅姑撫

稚弱茹蘗飲冰之作其子光禧光煦光文皆官縣令
光岷成進士官刑曹晚年就養光煦定襄縣署以老
壽終此才媛而兼節孝食報於後者冷吟集如望禧
兒書云浮雲日悠悠山川間南北游子滯他鄉絲邈
無消息豈不戀衰親烏私耿胸臆豈不念同懷寤寐
想顏色川塗有修鱗雲路有征翼胡爲書不至令我
心轉側東鄰女云十五東鄰女十八商人婦上堂拜
舅姑下堂任井臼欲別牽郎衣語澁羞出口三歲期

不歸晉人賈於外每約三年歸竟有終身不歸者妾終爲君守秋雨云鳴

軋鳴機杼青燈瘦可憐夜涼風簌簌秋老雨綿綿寫
怨託瑤瑟療饑典翠鈿繩窗獨不寐破壁斂寒烟秋
日仁化寺弔湯秋史年丈云蕭瑟江關已可哀玉棺
遺蛻掩蒼苔松壇斜日搖旛影蘚壁淒風颺紙灰父
執早年欽北海門人私謚擬南雷招魂若有蘭陵酒
還向西州灑淚來又北風行爲林甥作云北風刮地
飛塵沙客中作客何爲家相迎相送復成別塵勞兩

鬢增霜華荒村獨夜數寒柝恐亦難免生容嗟嗟子

暮齒感聚散兒曹志遠爭脂車

大兒遊宦福建海氛方熾音問不通四兒

從軍山海關外

人生識字憂患始東坡所慨良非差何如田

家有至樂春桑夏麥秋壺瓜在昔舅姑畱吉語道子

晚景娛烟霞每自曠懷效明達無如別緒紛如麻歸

田有約定何日骨肉散處天一涯無聊且聽穉子語

堂北已種忘憂花感慨身世想見始困終亨之象

翦綵爲花其製已古武進陽湖志土產通草花絨花

蓋以通草染五色絨則刮染爲片翦製枝葉花朵名
像生花常州女工所製盛傳各省韻卿夫人有寒夜
翦綵詩云翦綵奪天工霏霞片片紅生涯嗟十指芳
意鬱千叢不借東皇力無須花信風療貧窮小技霜
月隔簾櫳又有寒夜自製通草花感作解語花詞云
光陰草草世界花花何處幽懷寫數椽鴛瓦霜華重
課子一鐙初地機聲軋軋作去只贏得淚珠盈把誰爲
憐生計難拋翦綵消長夜 休說寒閨韻雅甚天然

工巧奚辨真假葉攢花亞檀心苦宛轉細薰蘭麝并
刀試乍並不向東風輕借待買來深巷明朝增洛陽
聲價卞頌臣制軍序謂卽此可想見含茶茹檠時操
履之純潔云

曾吟村太僕名詠與家硯生兄乙未同鄉舉旋以甲
辰進士官戶部出守吉州後歿於太平軍次贈太僕
寺卿銜夫人仿私諡康惠之義撰墓銘像贊又編次
其吟雲仙館詩一卷太僕家世耕讀詩清雅跌宕夏

日卽景云時鳥催耕故故嘯四郊油碧麥初齊野藤
無架青聯幄宿藕有花紅過隄魚沫浪圓噓水活燕
巢泥潤壓簷低田家自得怡然境菽水盤餐進赤藁
棉花云種秔種秔費商量間課妻孥事更忙六月雪
花開滿地不知他日有冰霜暑中夜坐云蓬海蒼茫
百丈瀾洪鑪九轉欲成丹仙人鍊藥忙如許未到飛
昇總是難初春云出門無所見愁絕是鷲塵冷落梅
花夢蕭條楊柳春拔山風力勁浴海日華新回首東

南望哀鴻正苦辛
秋日感作云東方儘讓侏儒飽
端木焉知原憲貧
眼看秋空盤俊鶻
心憐枯澗涸游鱗
草元能免覆瓿
諄守黑甯遭按劍
瞋每向鏡中逢
故我漫從籬下寄
伊人笑他彈鋏無
眞賞肯自吹竽步
後塵
落落情懷更誰語
西風和夢到菰莼